

佛說樹提伽經

劉宋天竺三藏求那跋陀羅譯

佛言有一長者名爲樹提伽倉庫盈溢金銀具足奴婢成行無所乏少有一白氎手巾掛著池邊遇天風起吹王殿前王即大會群臣坐共參論羅列卜問怪其所以諸臣皆言國欲將興天賜白氎唯樹提伽默然不言王語樹提伽諸臣皆喜卿以無言樹提伽答言不敢欺王是臣之家拭涕之巾掛著池邊遇天風起吹王殿前以是之故默然不言却後數

日有九色之華大如車輪遇天風起吹王殿前王大會群臣坐共參論羅列卜問怪其所以諸臣皆言國欲將興天賜金華樹提伽默然不言王語樹提伽諸臣皆喜卿亦無言提伽答言不敢欺王是臣之家後園之中萎落之華遇天風起吹王殿前以是之故默然不言王語樹提伽卿家乃爾命卿約勅家中廣作調度朕須還歸將領二十萬衆到卿家看提伽答言願王共臣相隨臣家自然牀褥不須人敷自然飲食不須人作自然擎來不須

呼喚自然擎去不須反顧王將領二十萬衆到樹提伽南門直入閣中有一童子顏容端正肉色豐悅甚復可愛王語樹提伽是卿家兒郎以不答言臣不敢欺王是臣之家守閤之奴小復前進至內閤有一童女顏容端正肉色豐悅甚復可愛王語樹提伽卿家女婦以不答言臣不敢欺王是臣之家守閤之婢小復前進至樹提伽堂前白銀爲壁水精爲地王見謂呼水流疑不得前樹提伽即導王前以入將王企金牀踞玉机樹提伽婦一百

二十重金銀幃帳裏出爲王設拜眼中淚出王語樹提伽卿婦爲我設拜有何不憐眼中淚出答言臣不敢欺王聞王煙氣以是之故眼中淚出王言庶民然脂諸侯然蠟天子然漆亦無煙氣何得淚出樹提伽言臣不敢欺王臣家有一明月神珠掛著殿堂無晝無夜不須火光王是煙中之王是故聞氣耳樹提伽堂前有一十二重高樓將王上視東望西視南望北瞻黯黯惱惱已經一月大臣白王國計事大事須還歸料理人民王謂須臾小

復可忍樹提伽復將王後園之中看流泉浴池各皆可美甚復可愛黯黯惱惱已經一月大臣白王國計事大事須還歸料理人民王謂呼須臾小復可忍樹提伽七寶布施綾羅繒絲二十萬衆人馬車乘一時還國王即大會群臣共坐參論羅列卜問怪其所以樹提伽是我之民婦女宅舍過甚於我我欲伐之可取以不諸臣皆言宜可取之王將領四十萬衆推鍾鳴鼓圍樹提伽舍數百餘重樹提伽門中一力士手捉金杵一擬四十萬衆人

馬俱倒手脚繚戾腰髓嚶婆狀似醉容頭脚跛蹠不復得起樹提伽乘雲之車在虛空中來問諸人來時何意卧地不起大王遣來欲伐長者門中有一力士手捉金杵一擬今四十萬衆人馬俱倒繚戾腰髓嚶婆狀似醉容頭脚跛蹠不復得起樹提伽問諸人欲得起不諸人皆言欲得起樹提伽舉一神杖令四十萬衆人馬俱起還國王即遣使喚樹提伽我共同車而載往詣佛所問言世尊樹提伽是我之臣前身有何功德女婦宅舍過甚於

我佛言樹提伽五百商主將諸賁人齎持重寶經過險路于時深山之中見一病道人給其庵屋厚敷牀褥給其水漿錫銷米糧給其燈燭于時乞願願得天堂之供今得果報于時布施者是誰樹提伽是也病道人者我身羊下是也五百賁主人皆得阿羅漢道也佛說經竟王及諸臣發阿耨多羅三藐三菩提心禮佛即退

佛說樹提伽經

佛說法常住經

出安祐二錄開元錄云今附西晉錄

聞如是一時佛遊舍衛國祇樹給孤獨之園佛告諸比丘法者常存有佛無佛法住如故如來至真出現世間因為宣解分別深義敷演至慧志在小乘為說四諦苦習盡道生苦老苦病苦死苦求不得苦舉要言之有陰身苦設無有身當有何患是曰苦諦目貪於色耳鼻身口意亦復如是由此因緣成其六衰從來劫數甚大久矣既諦見斯已知為惡習